

14 SEP 2000

PERDANA MENTERI RASMI KAMPUS TETAP UMS

KOTA KINABALU, 14 Sept (Bernama) -- Perdana Menteri dijadual akan merasmikan kampus induk Universiti Malaysia Sabah (UMS) di Teluk Sepanggar Selasa depan.

Sempena perasmian itu Datuk Seri Dr Mahathir Mohamad akan menyampaikan amanatnya kepada kakitangan serta mahasiswa universiti di Dewan Kuliah Utama kampus itu, menurut satu kenyataan UMS hari ini.

Beliau turut dijadual melancarkan Yayasan UMS.

UMS diwujudkan pada November 1994 dan membuat pengambilan pertamanya seramai 205 orang pada pertengahan tahun 1995 bagi program pengajian Sains dan Teknologi, Perniagaan dan Ekonomi serta Sains Sosial.

Pembangunan fizikal UMS adalah secara berperingkat-peringkat dan ia dijangka siap sepenuhnya menjelang tahun 2004 dengan kos keseluruhan kira-kira RM980 juta.

Menurut kenyataan itu, buat masa ini pembinaannya sudah 80 peratus siap dan fasa pertama telah beroperasi sepenuhnya meliputi kompleks bangunan pengajian Sains dan Teknologi, pusat penataran ilmu dan bahasa serta dewan-dewan kuliah.

Kampus seluas kira-kira 400 hektar itu terletak berdekatan dengan Bangunan Dewan Undangan Negeri dan Bangunan Yayasan Sabah.

-- BERNAMA

HAK RON